

ତିତସ୍ୟଙ୍କ ନିକଟକୁ ପାଠଲଙ୍କର ପତ୍ର ପାଠଲ୍ ତିତସ୍ୟଙ୍କେ ଚିଠିଲେଖିଲାଟା ଏ ବଇର ବିସଇ ଜାନ୍‌ବାଟା

ପାଠଲର ଚାରଣା ଚିଠି ବିତ୍ତରେଅନି ତିତସ୍ୟ ବଇ ଗଟେକ୍ ।
ଜନ୍‌ଟାକି ମଣ୍ଡଲିକେ ନ ଜାନାଇକରି ଲକ୍‌ମନ୍‌କେ ଜାନାଇଲାନି ।
ବିନ୍ ତିନ୍‌ଟା ଚିଠି ଅଇଲାନି ୧ ମ ତିମତି, ୨ ଯ୍ ତିମତି ଆରି ପିଲିମନ୍ ।
ପାଠଲ୍ ତିତସ୍ୟଙ୍କେ ଜେନ୍ତୁକି ସେ ସବୁ ଲକ୍‌ମନ୍ ମୁଆଟେ ଆଉଲିଅଇକରି
ଏ ଚିଠି ପତ ବଲି ଲେଖିଲାନି । ପେରିତ୍ ଇସାବେ ତାର୍ କାଇକାଇଟା
ରଇବାର୍ ଦରକାର୍ ସେ ବିସଇରେ ବୁଜାଇଲାନି । ଏଟା କେତେଟା
ବିସଇ ତିତସ୍ୟ ଆଗେଅନି ଜାନିରଇଲା । ଏ ଚିଠି କିରିସ୍‌ଟ ଜନମ୍
ଅଇକରି ୨୩-୨୫ ବରସ୍ ବିତ୍ତରେ ପାଠଲ୍ ଲେକି ରଇସି ।

ପାଠଲ୍ କିରିତର୍ ଦିପେ ରଇଲା ମଣ୍ଡଲିମନ୍‌କେ ଚାଲାଇବାକେ
ତିତସ୍ୟଙ୍କେ ଆଦେସ୍ ଦେଲାନି । ସେ ସମାନ୍ ସିକିଆ ତିମତିକେ
ମିସା ଦେଲାଆଟେ । ପାଠଲ୍ ଏ ଚିଠିଟାନ୍‌ନେ ତିତସ୍ୟଙ୍କେ ମଣ୍ଡଲିର୍
ମୁକିଅ ଲକ୍‌ମନ୍‌କେ ବାଟ୍‌ଲା ଆରି ସେମନ୍‌କେ ସିକାଇବା ବିସଇରେ
ଲେଖିଲାନି । ଆଜିର୍ ମଣ୍ଡଲି ଆରି ମଣ୍ଡଲିର୍ ନେତାମନ୍ ସାସନ୍
କରବାକେ କେନ୍ତୁ ଗୁନ୍‌ଚଲନ୍ ରଇବାର୍ ଆଟେ ତାର୍ ଚିକିନିକି ସଙ୍ଗ୍
ଦିଆନ୍ ଦେବାର୍ ଦରକାର୍, ସେଟା ଚିଠିତେଇ ଲେଖିଲା ଆଟେ ।

ଏ ବଇ ବିତ୍ତରେ ରଇଲାଟା

୧. ପାଠଲ୍ ତିତସ୍ୟଙ୍କେ ସୁଆଲ୍ ଲକ୍‌ମନ୍‌କେ ବାଟ୍‌ବାକେ ଆଦେସ୍
ଦେଲାନି । ୧:୧-୧୭ ।
୨. ତାର୍‌ପଟେ ସେ ଲକ୍‌ମନ୍‌କେ ମିସା ଦରମ୍ ଜିବନେ ଜିଇବା
କାଇବାକେ ସିକିଆ ଦେବାକେ ଆଦେସ୍ ଦେଲାନି, ଜନ୍‌ଟାକି
ପରମେସର୍‌କେ ସାର୍‌ଦା କରାଇସି । ୨:୧-୩:୧୧
୩. ସାରାସାରି ପାଠଲ୍ ତାକର୍ ସାରାସାରି କାତା ଲେକି ଲେଖିବାଟା
ସାରାଇଲାଇନି । ୩:୧୨-୧୫

ତିତସ୍ୟଙ୍କେ ପାଠଲର ଚିଠି

୧ ମୁଇ ପାଉଲ୍, ଏ ଚିଠି ଲେଖିଲିନି । ମୁଇ ପର୍ଯ୍ୟେସରକେ ସେବାକରି ଜିସୁକିରିସ୍ତର୍ ଗଟେକ୍ ପେରିଡ଼ ଅଇଆତି ।

ଜନ୍ ଲକ୍ମନକେ ତାର୍ତ୍ତାନେ ତାଟ୍ ସଙ୍ଗ୍ ବିସ୍ବାସ୍ କରବାକେ ପର୍ଯ୍ୟେସର୍ ବାଟ୍ଲା ଆତେ, ଆରି ସେମନ୍ ଜେଣ୍ଟିକି ଜିସୁକିରିସ୍ତର୍ ନିକ ସିକିଆ ବୁଢ଼ବାଇ, ସେନ୍ତାରି ଲକ୍ମନକେ ସାଇଜ କରବାକେ ମୁଇ ବାଟିଅଇଆତି । ଏ ସିକିଆ ନିକସଙ୍ଗ୍ ଜାନଲେ, ପର୍ଯ୍ୟେସରକେ ସାରଦା କରାଇବା ପାରା ଚଲାଚଲ୍ତି କରବାକେ ସେମନ୍ ସିକ୍ବାଇ । ୨ ଏନ୍ତାରିଅଇ ସେମନ୍ କାଲ୍କାଲ୍ ଜୁଗ୍ଜୁଗ୍ ପର୍ଯ୍ୟେସରର୍ ସଙ୍ଗ୍ ବର୍ତ୍ତବାକେ ଆସା କରବାଇ । କାଇକେବଇଲେ କାଇଟା ତିଆର୍ ନ ଅଇତେ କାଲ୍କାଲ୍ ଜୁଗ୍ଜୁଗ୍ ତାର୍ ଲକ୍ ତାର୍ ସଙ୍ଗ୍ ବର୍ତ୍ତବାଇ ବଲି ପର୍ଯ୍ୟେସର୍ କାତା ଦେଇରଇଲା । ଏଟା ପୁରାପୁରୁନ୍ ସତ୍ ବଲି ଆମେ ଜାନ୍ଲୁନି । କାଇକେବଇଲେ ସେ କେବେ ମିଟ୍ ନ କଏ । ୩ ପର୍ଯ୍ୟେସର୍ ଟିକ୍ କଲା ବେଲାଇ ମୁଇ ସୁବ୍ବକବର୍ ଜାନାଇଲିକେ, ଲକ୍ମନ ସେଟା ବୁଢ଼ବାକେ ସେ ବପୁଦେଲା । ଏଟା ପର୍ଯ୍ୟେସରର୍ କାମ୍ । ସେ ଆକା ଆମ୍ବକେ ରକିଆ କର୍ସି । ସେ ଏ ଦାଇଡ଼ ଦେଇକରି ମକେ ତିଆର୍ଲା ଆତେ ।

୪ ✧ଏ ତିତସ୍, ତର୍ପାଇ ମୁଇ ଏ ଚିଠି ଲେଖିଲିନି । ଆମେ ଜିସୁକିରିସ୍ତକେ ବିସ୍ବାସ୍ କଲାଟ୍ପାଇ ତୁଇ ମର୍ ନିଜର୍ ପଅପାରା ଅଇ ଆଚୁସ୍ ।

ବାବା ପର୍ଯ୍ୟେସରକେ ଆରି ଆମର୍ ଉଦାରକାରିଆ ଜିସୁକିରିସ୍ତକେ ମୁଇ ବାବୁଜିଆ କଲିନି, ସେମନ୍ ତକେ ଦୟା ଦେକାଅଡ଼ ଆରି ସାନ୍ତି ଦେଅଡ଼ ।

କିରତେଇ ତିତସ୍ କାମ୍

୫ କିରତେ ତକେ ରଇଜା ବଲି ମୁଇ କଇରଇଲି । ଜେଡ଼କି ସବୁ କାମ୍ କରିସାରାଇବାକେ ମକେ ବେଲା ନ ରଇଲା, ସେଟା କରିସାରାଇବାକେ ମୁଇ ସେନ୍ତାରି କଲି । ଏଟା ଅଇଲାନି ପର୍ତୁଡୁମ୍ ବିସଇ । କିରତେ ରଇବା ସବୁ ଜାଗାର୍ ମଣ୍ଡଲିମନ୍କେ ପାର୍ତିନ୍ ଇସାବେ ଲକ୍ମନକେ ବାଟ୍ । ମୁଇ ତର୍ ସଙ୍ଗ୍ ରଇଲାବେଲେ ଏ ବିସଇନେଇ ତକେ ତିଆରି ରଇଲି । ୬ ✧ଜନ୍ ଲକ୍କେ ତୁଇ ପାର୍ତିନ୍

✧ ୧:୪ ୧:୪ ୨ୟ କରଣ୍ଡିୟ ୮:୨୩; ଗାଲାତିୟ ୨:୩; ୨ୟ ତିମତି ୪:୧୦ ✧ ୧:୭ ୧:୭ ୧ମ ତିମତି ୩:୨-୭

ଇସାବେ ବାବୁସୁ, ସେ ଏନ୍ତାରି ଲକ୍ ଅଇବାର୍ ଆଚେ, କେ ମିସା
 ତାକେ ବୁଲ୍ କଲାନ୍ତି ବଲି ଦସ୍ ଦେଇନାପାରତ୍ । ତାକେ ଗଟେକ୍ ସେ
 ମାଇଜି ରଇବାର୍ ଆଚେ । ତାର୍ ପିଲାଟକିମନ୍ କିରିସ୍ତକେ ବିସ୍ବାସ୍
 କରବାର୍ ଆଚେ । ସେମନ୍ ନିକ ଚଲାଟଲ୍ତି କରତେରଇବାର୍ ଆଚେ
 । ଜେନ୍ତାରି କି ତାକର୍ ଆୟାବାବାମନ୍‌କେ ମାନତ୍ ନାଇ କି ନିଜର୍
 ମନ୍ କଲା ଇସାବେ ଚଲାଟଲ୍ତି କଲାଜନି ବଲି ସେମନ୍‌କେ କେ ଦସ୍
 ଦାରି ନାପାରତ୍ ।^୭ ବିନ୍ ବିସ୍ବାସିମନ୍‌କେ ଜତନ୍ କରବାକେ ଦାଇତ୍
 ଇସାବେ ପର୍ମେସର୍ ଗଟେକ୍ ପାର୍ତିନିକେ ଦେଲାଆଚେ । ତେବର୍
 ପାଇ ଜନ୍ ମଣ୍ଡଲିର୍ ପାର୍ତିନିକେ ତୁଇ ବାବୁସୁ, ତାକେ କାଇ ଦସ୍ ନ
 ରଅ । ସେ ବଡ୍‌ପନିଆ ନ ରଇବାର୍, ଦାପ୍‌ରେ ରିସା ନ ଅଇବାର୍,
 ମଦୁଆ ନ ରଇବାର୍, ବିନ୍ ଲକର୍ ସଙ୍ଗ୍ କିରଜାଟି ନ ଅଇବାର୍,
 ଡାବୁକେ ଆସା ନ କରବାର୍ ।^୮ ସେନ୍ତାରି ନ ଅଇକରି ଲକ୍‌ମନ୍‌କେ
 ଡାକିନେବା ଲକ୍, ଦରମ୍ ବିସଇ କରବାକେ ମନ୍ କରବା ଲକ୍, ନିଜେ
 ଜାଗରତ୍ ରଇବା ଲକ୍, ବଡ୍ ସାନ୍ ଇସାବେ ନ ଦେକ୍‌ବା ଲକ୍, ସୁକଲ୍
 ଇସାବେ ଚଲାଟଲ୍ତି କରବା ଲକ୍, ନିଜେ ମନ୍‌କରବା ବିସଇଟାନେ
 ଜାଗରତ୍ ଅଇବା ଲକ୍, ରଇବାର୍ ଆଚେ ।^୯ ସେ ଲକ୍ ଆମେ
 ସିକାଇତେରଇବା ସୁବ୍ କବର୍ ଡାବ୍‌ସଙ୍ଗ୍ ବିସ୍ବାସ୍ କରିରଇବାର୍
 ଆଚେ । ଏ କବର୍ ସତ୍ ଆରି ନ ବାଦ୍‌ଲେ ବଲି ସେ ଜାନ୍‌ବାର୍
 ଆଚେ । ଏନ୍ତାର୍ ଆଲେ ସେ ଲକ୍‌ମନ୍‌କେ ସତ୍ ବିସଇ ସିକାଇପାର୍‌ସି
 । ଆରି ଜନ୍ ଲକ୍ ତାର୍ ବିରୁଦେ କାତା ଅଇଲାଜନି, ତାକର୍ ବୁଲ୍
 ଦେକାଇପାର୍‌ସି ।

^{୧୦} ମଣ୍ଡଲିର୍ ପାର୍ତିନିମନ୍‌ର ଅଦିକାର୍ ନ ନାମ୍‌ବା ଲକ୍
 ବେସି ରଇଲାପାଇ ମୁଇ ତକେ କଇଲିନି । କାଇ ମୁଲିଅ ନ
 ରଇବା କାତା ସବୁ ସେମନ୍‌କେ ସିକାଇକରି, ସେମନ୍‌କେ ବିସ୍ବାସ୍
 କରାଇଲାଜନି । ଜିଉଦି ନିୟମ୍ ଇସାବେ ସବୁ ବିସ୍ବାସିମନ୍ ସୁନତ୍
 ଅଇବାର୍ ଆଚେ ବଲି ସିକାଇଲାଜନି ।^{୧୧} ଏନ୍ତାରି ଲକ୍‌ମନ୍‌କେ
 ସିକାଇବାକେ ଦେସ୍ ନାଇ । କାଇକେବଇଲେ ନ ସିକାଇବା ବିସଇ
 ସିକାଇକରି ସେମନ୍ ଗୁଲାଇ କୁଟୁମ୍‌ମନ୍‌କେ ବିସ୍ବାସ୍ କରାଇ, ସତ୍
 ବିସଇତେଇ ଅନି ବାଉଡାଇଲାଜନି । ଲକ୍‌ମନ୍‌ରଟାନେଅନି ଡାବୁ
 ମିଲାଇବାକେ ମିସା ଏନ୍ତାରି କଲାଜନି ।^{୧୨} କିରତେଅନି ଆଗେ
 ଗଟେକ୍ ଗିଆନ୍ ରଇବା ଲକ୍ ରଇଲା । ସେ ଏନ୍ତାରି କଇରଇଲା,

“ କିରତେରଇବା ଲକ୍ମନ ବେସି ମିଚ୍ କଇବାଇ । ସେମନ୍ ବନର୍ ପସୁପାରା ତଲ୍ଲୀତଲ୍ଲି କରବାଇ ଆରି ସେମନ୍ ବେସି ଅଲ୍ଲିଆ ଆରି କାଉରାମନ୍ ।” ^{୧୩} କିରତେ ରଇବା ଲକ୍ମନ୍ ବିସଇ ସେ ବବିସତ୍‌ବକ୍ତା କଇଲାଟା ଏବେ ମିସା ସତ୍‌ସେ । ତେବର୍ ପାଇ ସେମନ୍‌କେ ଡାଟ୍ ସଙ୍ଗ୍ ଦମ୍‌କାଇକରି କଇବାର୍ ଆତେ । ଜେନ୍ତାରିକି ସେମନ୍ ସତ୍ ସିକିଆ ବିସ୍‌ବାସ୍ କରବାଇ । ^{୧୪} ଜିଉଦି ଲକ୍ମନ୍ ତିଆରକଲା କାତାନିମନ୍ ନ ମାନିକରି ଆରି ସତ୍ ସିକିଆ ନ ମାନିକରି ରଇବା ଲକ୍ମନର୍ ତିଆରକଲା ରିତିନିତି ଦିଆନ୍ ନ କରତ୍ । ^{୧୫} ଜନ୍ ଲକ୍ମନ୍ ପରମେସର୍ ଦେକ୍‌ବା ଇସାବେ ସୁକଲ୍ ରଇବାଇ, ସେନ୍ତାରିସେ ତାକର୍‌ପାଇ ସବୁ ବିସଇ ସୁକଲ୍ ରଇସି । ମାତର୍ ଜନ୍ ଲକ୍ମନର୍ ବିବେକ୍ ସେମନ୍‌କେ ଦସି କରସି, ସେମନ୍ କାରାପ୍ ଅଇ ଜିସୁକିରିସର୍‌କେ ବିସ୍‌ବାସ୍ ନ କଲେ, ତାକର୍‌ପାଇ କାଇ ବିସଇ ମିସା ସୁକଲ୍ ନାଇ । ^{୧୬} ଏ ଲକ୍ମନ୍ ପରମେସର୍‌କେ ଜାନିଆରୁ ବଲି କଇ ତୁଲ୍‌ବାଇ, ମାତର୍ ତାକର୍ ତଲ୍ଲୀତଲ୍ଲିଟାନେ ସେଟା ନ ତିସେ । ସେମନ୍ ଗିନ୍ କରବାଲକ୍, କାତା ନ ମାନ୍‌ବା ଲକ୍ ଆରି କାଇ ଦରମ୍ ବିସଇ କଇବାକେ ନାପାରତ୍ ।

୨

ସତ୍ ଦରମର୍ କାତା

^୧ ମାତର୍ ତିତସ୍ ତୁଇ ବିସ୍‌ବାସିମନ୍‌କେ ଜନ୍ ବିସଇ ସିକାଇଲୁସିନି ସେଟା ଜିସୁକିରିସର୍‌କେ ସତ୍ ସିକିଆ ଇସାବେସେ ସିକା । ^୨ ପର୍‌ତୁମ୍ ଡକ୍‌ରାମନ୍‌କେ ତାକର୍ ଜିବନେ ନିକ ତଲ୍ଲୀତଲ୍ଲି କରବାକେ ସିକା, ଜେନ୍ତାରି ନିଜେ ବୁଦିର୍‌ସଙ୍ଗ୍ ରଇ, ଲକ୍ମନର୍‌ଟାନେଅନି ସନ୍‌ମାନ୍ ପାଇବାଲକ୍ ପାରା ଅଇ ଜାଗ୍‌ରତ୍ ରଇବାର୍ । ସେମନ୍ ପରମେସର୍‌କେ ଡାଟ୍‌ସଙ୍ଗ୍ ବିସ୍‌ବାସ୍ କରି ବିନ୍ ଲକ୍ମନ୍‌କେ ସତ୍‌ସଙ୍ଗ୍ ଆଲାଦ୍ କରି ମୁରତି ରଇବାର୍ ଆତେ । ^୩ ସେନ୍ତାରିସେ ଡକ୍‌ରିମନ୍‌କେ ମିସା ସିକାଆ । ଜେନ୍ତାରି, ସେମନ୍ ସୁକଲ୍ ତଲ୍ଲୀତଲ୍ଲି କରବାଇ । ତିପୁଲ୍ କାତା ନ କଇକରି, ମାତୁଆଲ୍‌ନିମନ୍ ନ ଅଇକରି, ତାର୍ ବାଦୁଲେ ବିନ୍ ଲକ୍ମନ୍‌କେ ନିକ ବିସଇ ସିକାଅତ୍ । ^୪ ଏନ୍ତାରି କଲେ ସେମନର୍ ଟାନେଅନି ଦାଙ୍ଗ୍‌ଡିମନ୍ ନିକ ତଲ୍ଲୀତଲ୍ଲି କରବାଟା ସିକ୍‌ବାଇ । ସେମନ୍ ପର୍‌ତୁମ୍ ନିଜର୍ ମୁନ୍‌ସକେ ଆରି

ପିଲାଟକିମନ୍କେ ଆଲାଦ୍ କରବାଟା ସିକଡ଼ । ୫ ନିଜେ ଜାଗରଡ଼ ଅଇକରି ମୁନୁସ୍‌ମନ୍କେ ସୁକଲ୍ ଚଲାଚଲ୍‌ତି କରି, ନିଜର୍ ଗର୍ଦୁଆର୍ ଚାଲାଇକରି, ବିନ୍ ଲକ୍‌ମନ୍କେ ଦୟା ଦେକାଇକରି ଆରି ନିଜର୍ ମୁନୁସର୍ କାତା ମାନିକରି ରଇବାକେ ସିକା । ସେନ୍ତାର୍ କଲେ ପରମେସର୍ ଆମ୍‌କେ ସର୍ପି ଦେଲା କବର୍ କେ ମିସା ନିୟା ନ କରଡ଼ ।

୬ ସେନ୍ତାର୍ ସେ ଦାଙ୍ଗ୍‌ତାମନ୍କେ ମିସା ନିଜେ ଜାଗରଡ଼ ରଇବାକେ ସିକା । ୭ ତୁଇ ନିଜେ ସବୁ ବିସଇଟାନେ ନିକ ଚଲାଚଲ୍‌ତି କର୍ । ଜେନ୍ତାରି କି ତକେ ଦେକିଦେକି ଦାଙ୍ଗ୍‌ତାମନ୍ ସେନ୍ତାରି ଅଇବାଇ । ସିକାଇଲାବେଲେ, ମନ୍ ସଡ଼ ରଇକରି ଲକ୍‌ମନର୍ ମୁଆଟେ ସନ୍‌ମାନ୍ ପାଇଲାପାରା ପରମେସର୍‌ର ବିସଇ ସିକା । ୮ ଜେଡ଼କି ବିସଇ ସିକାଇଲୁସ୍‌ନି, ସେ ସବୁ ବିସଇ ସଡ଼ ରଅ ଜେନ୍ତାରିକି ଲକ୍‌ମନ୍ ନିୟା କରିନାପାରଡ଼ । ଜେଡ଼କି ଲକ୍ ଜିସୁକିରିସ୍‌ଟର୍‌ପାଇ ତୁଇ କରବା କାମ୍ ବିରଦ୍ କଲାଇନି, ସେମନ୍ ସବୁ ଲାଜ୍ ଅଇଜିବାଇ । କାଇକେବଇଲେ ଆମ୍‌କେ ନିୟା କରବାକେ ତାକର୍‌ଟାନେ କାଇଟା ନ ରଏ ।

୯ ତର୍ ମଣ୍ଡୁଲିମନ୍କେ ରଇବା ଗତିଦାଙ୍ଗ୍‌ତାମନ୍କେ ତାକର୍ ସାଉକାର୍‌ମନ୍କେ ମାନିକରି ରଇବାକେ ସିକା । ତାକର୍ କରବା କାମ୍ ଦେକି ସାଉକାର୍‌ମନ୍ ସାର୍‌ଦା ଅଅଡ଼ ଆରି ସାଉକାର୍‌ମନ୍କେ ସେମନ୍ ଟଣ୍ଡୁ ନ ଲାଗାଅଡ଼ । ୧୦ ସାଉକାର୍‌ର କାଇ ଜିନିସ୍ ନ ଚରାଇକରି ସବୁବେଲେ ଦରମ୍ ଚଲାଚଲ୍‌ତି କର । ସେମନ୍କେ ସାଉକାର୍ ବିସ୍‌ବାସ୍ କରବାର୍ ଆଟେ । ତାକର୍ ନିକ ଚଲାଚଲ୍‌ତି କରବାଟା ଦେକି ଆମ୍‌କେ ମୁକ୍ତି ଦେବା ପରମେସର୍‌ର କବର୍ ସୁନ୍‌ବାକେ ଲକ୍‌ମନ୍ ମନ୍ କରବାଇ ।

୧୧ କାଇକେ ବଇଲେ ପରମେସର୍ ଗୁଲାଇ ମୁନୁସ୍‌ଜାତିକେ ପାପେଅନି ମୁକ୍ତି କରବାକେ ତାର୍ ଦୟା ଦେକାଇଲା ଆଟେ । ୧୨ ସେ ଦୟା କଲାକେ, କାରାପ୍ ଚଲାଚଲ୍‌ତି କରବାଟା ଚାଡ଼ିକରି, ବିସ୍‌ବାସ୍ ନ କରବା ଲକ୍‌ମନ୍ କରବା ଚଲାଚଲ୍‌ତି ନ କରି, ସେମନ୍ ଲାଲ୍‌ସା ଅଇବା ବିସଇ ମନ୍ ନ କରବାକେ ପରମେସର୍ ଆମ୍‌କେ ସିକାଇଲାନି । ତାର୍ ବାଦୁଲେ ଜେଡ଼କି ଦିନ୍ ଆମେ ଏ ଜଗତେ ବଠିଆରୁ, ସେଡ଼କି ଦିନ୍ ନିଜେ ଜାଗରଡ଼ ରଇ, ଦରମ୍ ଚଲାଚଲ୍‌ତି

କରି ତାକେ ସାର୍ଦଦା କରାଇବାକେ ସେ ଆମ୍ଭକେ ବପୁ ଦେଲାନି । ୧୩ ଜନ୍ ବଡ଼ ଦିନ୍ ଆଇବାକେ ଆମେ ଜାଗିଆରୁ, ସେଡ଼କି ଦିନ୍ ଜାକ ଏନ୍ତାରିସେ ଚଲାଚଲ୍ତି କରୁ । ସେ ଦିନେ ଜିସୁକିରିସଟ ଜେକି ଆମର୍ ପର୍ମେସର୍ ଆରି ମୁକ୍ତିକାରିଆ, ତାର୍ ସବୁ ଡାକ୍‌ପୁଟା ସଙ୍ଗ୍ ଏ ଜଗତେ ବାଉଡିଆଇସି । ୧୪ ✨ଏ ଜିସୁ କିରିସଟ ଆମର୍ ଲାଗି ମର୍ବାକେ ନିଜେ ସର୍ପିଅଇଲା । ପାପର୍ ବାନ୍ଦନେଅନି ମୁକ୍ତାଇବାକେ ଆରି ତାର୍‌ପାଇ ସୁକଲ୍ ଲକ୍ କରାଇବାକେ ସେ ଏନ୍ତି କଲା । ସେ ଦେକ୍‌ବା ଇସାବେ, ଦରମ୍ କାମ୍ କର୍ବାକେ ବେସି ମନ୍ କର୍ବା ଲକ୍ ଅଇବାକେ ମିସା ।

୧୫ ତେବର୍‌ପାଇ ତିତସ୍ତ, ତୁଇ କିରତେ ରଇବା ବିସ୍‌ବାସିମନ୍‌କେ, ମୁଇ ତକେ କଇରଇବା ସବୁ ବିସଇ ସିକାଇଦେସ୍ । ଏ ସବୁ ବିସଇ କର୍ବାକେ ସାର୍ଦଦା କରା ଆରି ନ କଲେ ସେମନ୍‌କେ ଜାଗ୍‌ରଡ଼ କରା । ସେନ୍ତାରି କର୍ବାକେ ତର୍ ଅଦିକାର୍ ଆଚେ । ତୁଇ ସିକାଇଲା ବିସଇମନ୍ କେ ମିସା ନିର୍ ଇସାବେ ନ ନାମଡ଼ ।

୩

ବିସ୍‌ବାସି ମନର୍ କାତାବାର୍‌ତା

୧ ସାସନ୍‌କାରିଆ ଆରି ଅଦିକାରିମନର୍ ତଲେ ରଇକରି ସେମନ୍ ତିଆର୍‌ଲାଟା ମାନିକରି ରଇବାକେ ମଣ୍ଡଲିର୍ ବାଇବଇନିମନ୍‌କେ ଏତାଇଦେସ୍ । ବିନ୍ ଲକ୍‌କେ କାଇ ସାଇଜ ମିସା କର୍ବାକେ ଜାଗ୍‌ରଡ଼ ଅଇରଅଡ଼ । ୨ ବିନ୍ ଲକ୍‌କର୍ ବିସଇ ମିର୍ ନ କଇ ସବୁର୍ ସଙ୍ଗ୍ ସାନ୍ତିସଙ୍ଗ୍, ଆଲାଦେ, ମନ୍‌ବିଡ଼ରେ ଦରମ୍‌ରଇ ମିସିବିଡ଼ି ରଅଡ଼ । ୩ କାଇକେବଇଲେ ଗଟେକ୍ ବେଲାଇ ଆମେମିସା ବକୁଆ ଲକ୍‌ପାରା ରଇ ପର୍ମେସର୍‌କାତା ନ ମାନିକରି, ବୁଲ୍ ବିସଇ କର୍ତେରଇଲୁ । ଆମର୍ ପାପର୍ ଗୁନ୍‌ଚଲନ୍ ଇସାବେ ଜେଡ଼କି ସବୁ ବିସଇ ରଇଲା, ସେଟା ସବୁ ସାର୍ଦଦାସଙ୍ଗ୍ କର୍ତେରଇଲୁ । ବିନ୍ ଲକ୍‌କର୍ ତିପୁଲ୍ କାତା ଗୁଲାଇବାଟେ ବିଚିକରି ସେମନ୍‌କେ ଇସା କର୍ତେରଇଲୁ । ସେମନ୍ ଆମ୍ଭକେ ଗିନ୍ କର୍ତେରଇଲାଇ, ଆମେମିସା ସେମନ୍‌କେ ଗିନ୍ କର୍ତେରଇଲୁ । ୪ ମାତର୍ ଆମେ

✨ ୨:୧୪ ୨:୧୪ ୧ ମ ପିତର୍ ୨:୯

ସେନ୍ତାରି ଚଲାଚଲ୍ଡି କରତେରଇଲେ ମିସା ଆମର ମୁକ୍ତିକାରିଆ ପରମେସର ନିଜର ଦୟା ଆରି ଆଲାଦ୍ ଆମ୍ଭେ ଦେକାଇଆଚେ ।^୫ ପାପର ତଣ୍ଡେଅନି ସେ ଆମ୍ଭେ ମୁକ୍ତଲାଇଲା । ଆମେ ଦରମ୍ କାମ୍ କଲାର୍ପାଇ ସେ ଆମ୍ଭେ ଏନ୍ତି କରେନାଇ । ମାତର ସେ ଆମ୍ଭେ ଜିବନ୍ ଦୁକାଇ ଦୟା ଦେକାଇଲାକେସେ । ସୁକଲ୍ ଆତ୍ମା ଦେଇକରି ସେ ଆମ୍ଭେ ରକିଆ କଲା । ଜେକି ଆମର ସବୁ ପାପ ଦଇକରି ନୁଆ ଜିବନ୍ ଦେଲା ।^୬ ଆମର ରକିଆକାରି ଜିସୁକିରିସ୍ଟ କଲା କାମରଲାଗି ପରମେସର ଏଟା କଲା । କାଇ ମୁଲିଅ ନ ଦେଇ ଜେଡକି ବଇଲେ ସେଡକି ଆମ୍ଭେ ସୁକଲ୍ଆତ୍ମା ଦେଲା ଆଚେ ।^୭ ପରମେସର ଆମ୍ଭେ ତାର ପିଲାଟକି କରବାକେ ଏନ୍ତାରି କଲା ଆଚେ । ତାରସଙ୍ଗ୍ କାଲକାଲ୍ ଜୁଗ୍ଜୁଗ୍ ବର୍ତ୍ତବାକେ ଆମେ ଆସା କରବାର ଅଇସି । ଆମରପାଇ ରଇବା ତାର ବଡ୍ ଦୟାରଲାଗି, ତାର ମୁଆଟେ ଦସି ଇସାବେ ନ ଦେକେ । ପରମେସର ଆମ୍ଭେ କାଇ ଦସ୍ ନ କଲା ଲକ୍ବଲି ଜାନାଇଆଚେ ।^୮ ମୁଇ ତକେ ଲେକିରଇବା ଏ ସବୁ ବିସଇ ସଡ୍ ବଲି ମାନିଅଇସି ।

ତେବର୍ପାଇ ମୁଇ ତକେ ବାବୁଜିଆକରି କଇଲିନି, ତୁଇ ସିକାଇବାବେଲେ ଏ ସବୁ ବିସଇ ନ ପାସରି ଏତାଇତେ ର । ଜେନ୍ତାରିକି ପରମେସରକେ ଜେଡକି ଲକ୍ ବିସ୍ବାସ୍ କରବାଇ, ସେମନ୍ ସବୁ ଦରମ୍ କାମ୍ କରବାକେ ମନ୍ଦିଆନ୍ ଦେବାଇ । ଏନ୍ତାରି ସିକିଆ ଦେଲେ ସବୁ ଲକ୍ପାଇ ସେଟା ନିକ ଆରି କାମ୍ଭେ ଆଇସି ।^୯ ମାତର ଜନ୍ ଲକ୍ମନ୍ କାଇ ଲଡାକେ ନ ଆଇବା ବିସଇର୍ପାଇ ଦଦାପେଲା ଅଇବାଇ, ଆରି ତାକର କୁଟୁମର୍ ଆନିଦାଦିମନର୍ ବିସଇ କଇ ଲାଗିରଇବାଇ, ତୁଟାଇ ତୁଟାଇ ଦଦାପେଲା ଅଇବାଇ ଆରି ମସା ମିଲାଇରଇବା ରିତିନିତି ବିସଇନେଇ ଲାଗାଲାଗି ଅଇବାଇ, ସେନ୍ତାରିଟାନେ ପୁର୍ନାଇ । କାଇକେବଇଲେ ଏଟା କାକେ ଲଡାକେ ନ ଦେଏ, ଆରି ତୁଟାଇସେ ।^{୧୦} ବିସ୍ବାସିମନର୍ ବିତ୍ତରେ ଜଦି କେ ମିସା ଗଟେକ୍ ବେଗ୍ଲାଇବା ଲକ୍ ରଇଲେ, ତାକେ ତାଟ୍ ସଙ୍ଗ୍ କଇକରି ଚାଡାଇଦେସ୍ । ସେ ନ ଚାଡଲେ ଆରିତରେକ୍ ଜାଗ୍‌ରତା କରା । ତାରପଚେ ମିସା ସେ କରଲାଗିରଇଲେ ତାକେ ଚାଡିଦେସ୍ ।^{୧୧} ଏନ୍ତାରି ଲକ୍ ସଡ୍ ବିସଇତେଇଅନି ମନ୍ ବାଉଡାଇଲା ଆଚେ ବଲି

ତୁଇ ଜାନିପାରୁସ୍ । ତାର ପାପରଲୀଗି ସେ ପରମେସରର୍ ମୁଆଟେ ଦସ୍ କରିଆଟେ ବଲି ଲକ୍ମନ୍ ନିକସଙ୍ଗ୍ ଜାନ୍‌ବାଇ ।

ସାରାସାରି ବେଲର କାତା

୧୨ ☆ତକେ ସାଇଜ କରବାକେ ମୁଇ ଆରତେମସକେ ନଇଲେ ତେକିକସକେ ପାଟାଇବି । ଆକର୍ ବିତ୍ତରେ କେ ଆଲେ ଆଇଲେ, ତୁଇ ତେଇଅନି ବାରଇ ନିକପଲି ନଅରେ ମକେ ବେଟ୍ ଅଇବାକେ ଆଉ । କାଇକେବଇଲେ ସିତ୍‌ମାସ୍ ସାରୁବାଜାକ ତେଇ ରଇବାକେ ମୁଇ ମନ୍ କଲିନି । ୧୩ ☆ଜିନି ନାଉର୍ ଗଟେକ୍ ଅକିଲ୍ ଆରି ଆପଲ୍ ନାଉର୍ ଆରିଗଟେକ୍ ଲକ୍ ଜିବାକେ ବାରଇବାବେଲେ, ସେମନ୍‌କେ ଜେଡ୍‌କି ସାଇଜ ଲତା ଆଟେ, ସେଟା ସବୁ କରିଦେସ୍ । ସେମନ୍‌କେ ଲତାକେ ଆଇବାଟା ଜାଗାଇଦେସ୍ । ୧୪ ସେଟାକେ ଚାଡ଼ି କିରତେରଇବା ଆମର୍ ସବୁ ବିସ୍‌ବାସି ବାଇବଇନିମନ୍, ଦରମ୍ କାମ୍ କରବାଟା ନ ଚାଡ଼ିକରି, ପାଇଟିକାବାଡ୍ କରତେରଅଡ୍ । ସେଡ୍‌ବାରି କଲେ, ଅବାବେ ରଇଲା ଲକ୍ମନ୍‌କେ ଦେଇପାରବାଇ । ଆରି ବିସ୍‌ବାସିମନ୍ ବେକାର୍ ଜିବନ୍ ନ ବିତାଅଡ୍ ।

୧୫ ମର୍ ସଙ୍ଗ୍ ରଇବା ସବୁ ବିସ୍‌ବାସିମନ୍ ତକେ ଜୁଆର୍ ଜାନାଇଲାଇନି । କିରତେରଇବା ଆମର୍ ବିସ୍‌ବାସି ବାଇବଇନିମନ୍ ଜେଡ୍‌କିଲକ୍ ଆମ୍‌କେ ଆଲାଦ୍ କଲାଇନି, ସେମନ୍‌କେ ସବୁକେ ଆମର୍ ଜୁଆର୍ ଜାନାଇଦେସ୍ ।

ପରମେସର୍ ତାର ଜିବନ୍ ଦୁକାଇ ତମ୍‌କେ ଦୟା ଦେକାଅ ।

☆ **୩:୧୨** ୩:୧୨ ପେରିଡ୍ ୨୦:୪; ଏପିସିୟ ୬:୨୧,୨୨; କଲସିଅ ୪:୭,୮; ୨ୟ ତିମତି ୪:୧୨

☆ **୩:୧୩** ୩:୧୩ ପେରିଡ୍ ୧୮:୨୪; ୧ମ କରନ୍ଥିୟ ୧୬:୧୨

ସତ୍ତ୍ୱର ବାବ୍
The New Testament in the Desiya language of India:
ସତ୍ତ୍ୱର ବାବ୍ (Bible)

copyright © 2020 The Word for the World International

Language: ଦେଶିଆ (Desiya)

Contributor: The Word for the World International

ସତ୍ତ୍ୱର ବାବ୍
ଦ୍ୱିତୀୟା ନିୟମ, 2020

The New Testament in Desiya Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

PDF generated using Haiola and XeLaTeX on 21 Feb 2024 from source files dated 9 Apr 2023

cd4d7c1f-dc97-5fb4-a0ba-ab968fde9cde